

JUAN-GARDA-SOGBAAGWAD

3 JUAN

GEBE-SOGLENAID

Garda-nug

Juan, Bab-Burba-Isli gwaledbali gwenadgan-idued-Gayo'ye-nugadse garda narmaksiid. Binsamardo, we-garda birga 90'gi narmakles-insaye.

Juan-Garda-Sogbaagwadgi weyob sunmaklenaid

Juan, Gayo-nug-ogannosiid, ar we-gwenadgan-iduedde, gwenadgan-Bab-Jesús'ba-nanaimalad nue-bendakdiid. Demetrio'gi amba nued sunmaksibalid, ade, gwenadgan-nue-bendakdimogad. Diótrefes'di, gwenadgan-abargi na san-dummarba imakdiid. We-dule, Juan'ba ibsabidasulid. Deginbali, gwenadgan-Bab-igargi-sunmakdimalad wissur-abingadabalid.

We-gardagine, weyob ilemakar sunmaklenaid:

1. Gebe-sikwas-soglenaid (1:1-4).
2. Gayo'gi nued sunmakmalad (1:5-8).
3. Diótrefes, gwenadgangi ichakwa-daed (1:9-10).
4. Demetrio, dule-nued-daye sogmalad (1:11-12).
5. Napi-soglenaid (1:13-15).

Be itogua.

1. GEBE-SIKWAS-SOGLENAID

(1:1-4)

¹Ani an Jesús'ba-nanaimalad-e-idued, gwenad-sabesailad-Gayo'se garda narmaksiid. Ar an Gayo napiragwadgi sabed.

²Gwenad-sabesailad, an bega Bab-Dummadse goled, igi be-san-burbaled nueganbi nadapi, bitigi deyobi bega bela ibmar-nueganbi nadsunye, degi, gwen-uellesuli be gudii gusun. ³Ibayobi weligwar an itosa, gwenadgan-nonikid anga sognonigu, be innikigwadba gudiiye, degi, igar-napiragwadgi nue-nanadibarye. ⁴Bur-weligwar an-imaked, an itoalir, an-mimmigan igar-napiragwadgi nued nanadimarye.

2. GAYO'GI NUED SUNMAKMALAD

(1:5-8)

⁵Gwenad-sabesailad-Gayo, be bamalad-gwenadgan-bendakalile, be innikigwadgi bendakdaed.

Bur bule gwenadgan-yar-baidgi-danimalad be deyob imakdaed. ⁶We-gwenadgan Jesús'ba-nanaimalad-abargi sogmardo, bede nue-sabedgi gwenadgan-bendakdaye. Bab-Dummad-abegedyob, we-ibmar be imakoed. Degisoggu, neggwebur-baidse-naegala, nue-gatik we-dulemar be bendako. ⁷Ar we-gwenadgan, Bab-Jesús-nug-sabed-ular, Bab-akudakmaladse gwen bendaklessuli noargusmalad. ⁸A-ulale, anmar, we-gwenadgan-abingae-wilubbid. Ar deyobi, anmar, Bab-Igar-napiragwadba-sunmakedgi bendakmogoed.

3. DIÓTREFES, GWENADGANI ICHAKWA-DAED

(1:9-10)

⁹An Jesús'ba-nanaimaladse garda narmaksad. Ar Diótrefes'di, an-ega-ibmar-soged gwen itobisulid, ar ade, e na emar-iduedga-gued abedaed. ¹⁰A-ulale, an bemarse nadele, Diótrefes'ga an ibmar-bakar sogoed, ar ade, anmargi sunnasur sunmakdiid. Unnila wegibi gudisulid, ar gwenadgan-Jesús'ba-nanaimalad-yar-baidgi-danimalad, wissur-abingabalid. Ar gwenad-wargwen na e-neggi gwenadgan-abingabiele, Diótrefes, a-idu igar-biir mesdaed, degi, Jesús'ba-nanaimalad-abargi a-gwenad-onodabalid.

4. DEMETRIO, DULE-NUED-DAYE SOGMALAD

(1:11-12)

¹¹Gwenad-sabesailad-Gayo, mer dulemar-ibmar-isgana-imakmalad-daedba be dae, dulemar-ibmar-nuegan-imakmalad-daedba bur be dae. Ar dule-ibmar-nued-imakedi, Bab-Dummadgadid. Ar dule-ibmar-isgana-imakedi, amba aku-Bab-Dummad-daked.

¹²Bela-dulemar Demetrio'gi nuedbi sunmakedbimalad, degi, e-daedi anmarga oyomogad napira sogmarye. Ar anmar amba deyob sogmarmogad, Demetrio dule-nuedye. Ar bemar wisid, anmar-ibmar-sogedi, we napiragwadid.

5. NAPI-SOGLENAID

(1:13-15)

¹³Ar bukidar an bega-ibmar-soged nikanad, degi-inigwele, an bega gardagi narmakbisulid. ¹⁴Ar emisgwasaar an be-dako an-insado, agi anmar na asabin sunmakmaloed.

¹⁵Ulubgi bogidik be nikusun. Be-aimar bega sogsimalad, bede nued sogeye. Anmar-aimarga, wargwen-wargwengi ega be sogo, bemarde nueganbimar sogeye.